

Inatsisartut Suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffianni Inatsisartut aallartitaannut siulittaasup Lars-Emil Johansenip aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 1/2016-imik, ataani allassimatut oqaasertalimmik, Inatsisartut tapersiinnissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa siunnersuisoqatigiiffiup Issittumi Siunnersuisoqatigiinnut alaatsinaatsutut inissisimalernissaanik qinnuteqaataanik tapersersueqqullugit.

Nunat Avannarliit Killiit Siunnersuisoqatigiiffiat ulloq 27. august 2014 Issittumi Siunnersuisoqatigiinni alaatsinaatsutut inissisimalerniarluni qinnuteqarpoq. Qinnuteqaat Issittumi Siunnersuisoqatigiinni ministerit ulloq 24. april 2015 Canadami Eqalunni ataatsimiinneranni oqaluuserineqarpoq, tassanilu aalajangerneqarluni alaatsinaatsutut inissisimalernissamik qinnuteqaatit tamarmik suliarineqarnissaat 2017-imi upernaakkut USA-mi Fairbanksimi ministerit tullianik ataatsimiinnissaannut kinguartinneqassasoq. Nunat Avannarliit Killiit Siunnersuisoqatigiiffiata qinnuteqaataa taamaalilluni suli suliarineqanngilaq. Tamanna periarfissiiuvoq 2017-imi ministerit ataatsimiinnissaata tungaanut inatsisartut naalakkersuisullu qinnuteqaammik tapersersuinerminnik ersersitsisarnissaannut. Taamatut malitseqartitsiniarnermi immikkoortut pingaarutillit ilagaat nunani pingasuni pineqartuni inatsisartut naalakkersuisullu qinnuteqaat akueritinniarlugu timitalimmik sulissuteqarnissaat.

Nassuiaat:

Apeqqutit issittumut tunngasut pingaaruteqaleriartornerat ilutigalugu Nunat Avannarliit Killiit Siunnersuisoqatigiiffiata taamatuttaaq apeqqutit nunarsuup immikkoortuanut tamatumunnga tunngasut ukiumi kingullerni pingaartinnerulersimavai. Nunat Avannarliit Killiit Siunnersuisoqatigiiffiata Issittumi Siunnersuisoqatigiinni alaatsinaatsutut inissisimalernissamik qinnuteqaamminut ilaatigut tunngavilersuutigaa taamaaliornikkut issittumi qinikkat innuttaasut pisinnaatitaaffii soqutigisaallu eqqarsaatigalugit aalajangiiniartarnernut sunniteqarnissaminnut periarfissaqarnerulernissaat. Tamanna eqqarsaatigalugu Nunat Avannarliit Killiit Siunnersuisoqatigiiffiat ukiumi kingullermi suliniuteqarsimavoq Issittumi innuttaasut oqartussaaqataanerat pillugu oqallinneq siuarsarniarlugu, ilaatigut Arctic Circlemut atatillugu immikkut sammisaqartitsisarnikkut kingullermillu ulluni 30.-31. januar 2016 Issittumi innuttaasut oqartussaaqataanerat pillugu aalajangersimasumik qulequtaqartitsilluni ataatsimeersuartitsinikkut. Issittumi Siunnersuisoqatigiinni alaatsinaatsutut inissisimalernikkut Nunat Avannarliit Killiit Siunnersuisoqatigiiffiat Issittumi Siunnersuisoqatigiit, taamatullu aamma siunnersuisoqatigiiffiup suleqatigiissitaa assigiinngitsut, soorlu Issittumi piujuaannartitsinermik tunngavilimmik ineriartorneq pillugu suleqatigiissitap, ataatsimiinnerinut peqataasinnaalissaq. Alaatsinaatsutut

inissimalernissaq apeqqutit issittumut tunngasut pillugit nunat suleqatigiiinnerata nunallu tamalaat akornanni suleqatigiinnermut atatillugu Nunat Avannarliit Kiliit Siunnersuisoqatigiiffiata inissisimanerata siuarsarnissaanut alloriarnerussaaq pingaarutilik.

Pisortanut aningaasatigut allaffissornikkullu kingunerisassai

Soqanngilaq

Namminersortunut aningaasatigut allaffissornikkullu kingunerisassai

Soqanngilaq

Innuttaasunut aningaasatigut allaffissornikkullu kingunerisassai

Soqanngilaq